

曾忠襄公書札

曾忠襄公書札

卷之九目錄

復李子和

復劉霞仙

復劉壽卿

復江良臣

復徐壽蘅

復方存之

復方子穎

復陳舫仙

復鄭譜香

復鮑春霆

致劉省三

致譚竹巖制軍

復鮑春霆

致李少泉

致鮑春霆

復何小宋

復沈爐青

復鮑春霆

致姜清臣

致譚蘭亭

致蒯士薌

致周海船

復彭雪琴

復伍雲浦

致李子和中丞

致劉省三

復黃曉岱

復蔡硯農

致鮑春霆

復譚竹巖制軍

致譚竹巖制軍

致譚竹巖制軍

致劉仲良

致李子和中丞

致龍半舟

致鮑春霆

致鮑春霆

復巴玉農

復鮑春霆

致李少泉宮保

復李少泉宮保

致李筱帥

致英西林中丞

復郭意誠

復江良臣

致李幼泉

復潘伊卿

復何小宋

復劉綬卿

復李筱帥

復蔡硯農

復左季高宮保

復譚竹巖制軍

致劉省三

復黃南坡

復宋長慶

復劉韞齋中丞

致劉霞仙中丞

復李少泉宮保

復陳舫仙

復彭雪琴

復劉綬卿

致李少泉宮保

致郭筠仙中丞

復凌問樵

復譚文帥

致文質甫

復劉峴莊制軍

復陳小浦

復李子和

復葉蘭臺

復朱宇田

復魏溫雲

復譚文帥

復陳雋丞

復丁雨生

復葉蘭臺

復魏溫雲

曾忠襄公書札卷九

復李子和

春霆軍門前在黃州因水漲橋塌緩至旬餘起程後又因候戰車在黃安白果停住旋因捻股悉趨舞泌弟曾函商或少駐數日以候賊情畢露期共收夾擊之效嗣見捻逆尙回翔豫境卽催其相機進兵月初接渠復書稱改由黃安至羅山進紮正陽汝甯一帶相機迎剿取勢更緊云云敝處復函力贊其議昨又寄械趣之計卽日可入豫境家兄前咨將於襄陽設糧臺想係爲由襄樊進兵起見今旣紮營汝郡似已移步換形閣下已派蒯士薌觀察管理轉運事宜並令經理霆軍車輛汝甯爲南汝

道轄境委之照料最爲相宜家兄與閣下相見後必有商度也
惟據蒯觀察來函謂轉運等事豫邊各邑雇夫甚難弟已函致
鮑軍門請其格外體諒地方艱難矣張逆經大軍及劉張兩鎮
軍扼擊之於王橋擒斬甚夥聞之欣慰任賴兩逆合踞睢杞得
劉省三軍門及潘琴軒廉訪會師攻剿諒可殲之家兄上疏議
憑河阻賊卓見謂須痛剿北路俟該逆悉數南趨然後分地戰
守自是洞中形勢之論甚佩甚佩牛逆大股連日探報已擾及
唐縣新野鄧州等屬火星廟構林寨等處一片賊氛距襄棗隨
光極近搖足卽至弟已飭襄棗防軍嚴爲戒備並令郭軍門松
林於初八日由德安起程赴防隨州之唐縣鎮熊鎮登武卽日

馳赴應山與各路互爲犄角秀相之意擬派劉維楨七營赴隨州相機與各路會剿鄂之西路兵力漸厚矣知念奉聞

復劉霞仙

回逆竄犯秦疆經大軍扼之邊陲殲斃逾萬而賊黨甚衆有擾及咸陽者計勝算壯猷必能埽除回鶻綏靖三秦惟糧餉專恃地丁所入無多重以協濟甘軍轉輸益形支絀前奉 廷旨令晉蜀鄂三省各協五萬緩急人所時有在鄰封分應通融況弟與閣下誼同一家尤非泛常可比隨傳司道切實面諭時值糴臺拮据萬狀無欸可籌嗣囑小宋方伯於無可設法中竭力擘畫云必秋杪冬初乃能分批趕解計必有以報尊命但不能速

也甘肅叛卒之變吳貞陔觀察鍾伯平侍讀均已殉難良可憫
惻頃知蘭垣大定而河狄平固四面烽烟厚帥慘淡經營不知
能漸有轉機否時以爲念鄂省百度叢脞已久時勢所格無可
更張唯兵事餉事大端所繫不得不稍加整飭以期補救於萬
一而秀相之意已不謂然日昨上章以弟出省視師恐事權不
屬呼應不靈請賜幫辦軍務之命查 國家定制巡撫本應提
督軍務從未有別加幫辦之名以示歧異者而秀相忽倡此議
非常曠典鄙人何以克堪閣下聞之當必發一大噓特未卜
朝論以爲何如耳捻逆竄入汝甯比已羣趨唐縣新野鄧州等
屬與襄棗光隨相距咫尺一蹴卽至業經檄飭諸軍於西北邊

境分地勦禦以專責成弟定於二十六日親赴德安相機調度
如果捻股畢萃西路卽當馳詣襄陽督率前敵各營扼要截擊
尊意以潼商一帶未有防戍之兵恐逆蹤由此闌入弟意亦早
慮及之數日前已函商鮑軍門請其由隨棗一路繞出光穀爲
攔頭迎擊計並堵其入秦之路倘鮑軍能迅速前往則取勢較
緊賊必不敢挺走西陲至藍斯明一軍爲秀相私軍方倚以爲
重弟實未便與商卽商亦斷不見允徒費唇舌其實該軍人數
每百不滿七成營官攜帶家眷哨官亦有之早不中用弟亦無
如之何也家兄於前月由濟起程沂淮而上計月內可達周家
口烈日行舟炎蒸殊甚來書深以爲苦弟昨奉 寄諭有命督

同鮑劉諸軍與長公聯絡一氣協力勦辦之語自維蹇拙半生
奔走恒與戎馬爲緣而安坐堂皇者轉從而掣其肘可勝慨歎
夷人在都門者恫喝要挾大爲心腹之患深識如閣下有善策
以弭其釁否若弟則年力雖壯而人情之變幻世路之艱難閱
歷旣多已漸非曩時意氣矣閣下顧以埽盪中原相期何獎許
之過也去歲謠詠達人視之如浮雲之翳太虛不以介意雅量
高致迥邁時賢甚佩甚佩太冲猜忍無親專好擠排善類賜示
蒼鷹詞有霜晴閃爍側翅摩空之勢入後則風毛雨血灑野蔽
天而仍復寄托遙深婉而多諷邇都見之當爲頻首矧在吾輩
能不一讀一擊節耶筠叟入夏後音問濶絕聞已到長沙數日

卽還鄉矣如至鄂渚當代達盼望之意王鶴樵觀察厚帥擬邀
之入幕到陝後諒必面求閣下如可咨畱仍望畱之秦中尊處
各務均出親裁蓋營概可想見弟幕中刑名則劉君子英管理
牋記則宋君生香屬草皆屬正人君子大可分弟之勞惟每日
接見賓寮檢閱簿書絕少暇晷連日羽書狎至行色匆匆勞人
況味大畧相似辱承垂問謹附及之

復劉壽卿

頃接賜牋敬聆壹是承示捻逆竄據郿城之雙廟經麾下移營
進攻七日之內四獲勝仗冒雨冒暑涉水忍饑迤追至漯河四
合莊疊次斬馘奪械無算賊受痛創大挫凶鋒足覘克敵制勝

備極勤勞佩慰之至刻下逆氛竄擾唐縣新野鄧州一帶與隨
棗逼近搖足卽至弟現檄郭子美軍門所部進紮隨州之唐縣
鎮熊岳峰軍門所部進紮應山縣之廣水驛俱已到防彭杏南
方伯所部暫駐德安看賊趨重何處再前進會商勦辦霆軍戰
車約可齊備昨奉 廷旨趣由信陽進軍緣賊在新野唐縣誠
恐尾追不及轉滋秦陝之憂已疏請改由隨棗繞出光穀以便
攔頭迎擊頃函商鮑軍門尙未得其回書弟卽擬親赴德安定
於二十六日起程就近調度能否披亢擣虛共收合勦之效尙
未敢必也

復江良臣

前月二十三日復布寸函計早達覽頃接惠牋承示賊情瞭如指掌至以爲慰頃據光化縣稟報云鄧州已無賊蹤則內鄉淅川應亦鬆勁弟已函懇鮑春翁速從棗陽出境覘賊所在進城擊之仍以畱意屏蔽趨陝之路爲要著想春翁必能相機辦理也來函謂咨會山陝等省扼邊守要並聯皖豫各軍合剿爲一勞永逸之計刻下所籌正係如此辦法但不知能算入彀中否也弟於上月二十六日起程三十日抵德安擬暫駐旬日察看地勢且視賊趨向有定再行移動籌辦合剿也

復徐壽蘅

頃奉環章崇論閣議所以指示而開悟之者意深且厚惟宏獎

太過循誦數四既感盛情轉自愧耳卽維大雅宏達令德勤宣
指日翊佐 國家興利除弊必使靈臺偃伯渤澥無波此非獨
吾輩之私幸亦非弟一人之諛詞也鄂中百度叢脞已極弟不
自揣量思於兵事餉事少加整頓而形格勢禁多所牽掣深以
忝膺疆寄未能補救爲憂重辱揆張益滋心疚至共事諸君子
自司道以迄郡守閣下所品題者大率與鄙見相脗合牧令中
治行則黃牧稱最沈守保祥弟稔知其賢已調隨行營如吳令
亦誠樸可造柳令亟當畱心訪察卿月在霄容光必照而鄂渚
邈隔數千里外凡官吏之賢否靡不灼見真知藻鑒之精私心
傾折無已捻逆自曹州南遁迭有挫損而捻之長技在於剽疾

善走一經我軍擊敗則輕騎日夜行數百里所過之地恣意裹脅旬日間眾復數萬或十數萬若未截其去路而徒事追逐恐仍無以制其死命弟因邊防孔亟於七月二十六日出省暫駐德安月初據各路探報任賴一股回翔舞陽葉縣張牛等股肆擾鄧州新野而劉松山張詩日二軍已緊躡其後論月前形勢豫省東南北三面均有重兵唯西路空虛捻蹤飄忽靡常難保不挺而走險前已咨請鮑軍門星馳入豫一面屏蔽內鄉淅川以堵其入秦之路一面覘賊所向攔頭迎擊弟則令郭子美彭杏南等各統所部由桐柏唐縣間道橫截而出似亦四面搜逼之一法昨報新鄧境內之賊已退至南呂魯山鮑軍可卽從南

陽進剿兼顧西路弟擬近日馳赴襄樊隨棗一帶察看地勢通籌饋餉之路乃可派各營爲越剿計陸路轉運之難如此令人喟然甘事棘手異常叛卒之變鍾吳二君均及於難良可惋惜厚老處此危局自不得不借資羣策旋轉氣機卓見實是至論至以東南之餉辦西北之賊乃時勢不能不爾管見五年前曾論及之猥蒙激賞赭汗曷勝次青入黔之師聞已疊克堅寨直薄荆竹園機勢頗極順利爲之一快鯨海狂瀾漸有不馴之勢而一時尙不至橫潰計惟陰爲之備而陽示以羈縻勿絕且俟寰宇稍定共謀所以制之之策如治疾然元氣旣盛則外邪自無所依附而攻治較易爲力蓋謨以爲何如弟久歷戎旃大爲

風濕所苦刻下足疾仍未全愈步履尙屬艱澀厚勞垂注感謝
感謝

復方存之

奉到手函辱承獎借逾恒且讀且愧自與閣下握別金陵未嘗
不神馳左右良以在己之託業不高日以殺戮爲事故克城後
長揖歸去一則籍養病軀一則冀免愆尤乃在家年餘日日養
疴竟未能讀書明理努力崇德又復冒昧出山忝膺重寄自分
此生終身爲俗吏之所爲毫無補於時艱徒貽譏於大雅夙夜
悚懼良難爲懷乃蒙閣下不遺在遠惠寄訓言曷勝感激承囑
寄船山望溪兩先生全集查均尙未開刷刻下陽曉岑正在買

紙興工大約明年三月乃可刷成明年當奉寄一部以報雅命也至戴存莊先生書傳補商澗省刷者甚少皖中嚮慕者多自應將書板檢寄皖省以廣其傳近日當函致湘中友人遇便搭寄吳竹莊方伯處轉交孫海岑太守奉上弟七月杪行抵德安駐紮兩旬略爲布置近日將赴隨襄卽達襄樊大半可派郭子美軍門萬餘人出境會剿其餘各軍應守鄂境以固疆圉蓋出境之兵餉項不能久欠轉運必籌經費鄂之力量祇能如此耳知念奉聞

致方子穎

安州營次曾肅復函計已早達籤室鄂省兵事前函已略陳之

而捻跡靡常旦夕殊致方弟之赴德安也該逆尙近光襄意謂
邊陲有兵正可合擊迨調度稍備彼已聞風漸遙猶謂朱仙鎮
以下河防森嚴料難竄越乃該逆獨向朱仙鎮以上突犯豫軍
合股東去雖有銘鼎各軍跟勦連捷而茫茫平野無險可察因
趕赴樊城促霆軍於九月初八日由樊出境直詣周口郭子美
軍門亦已移紮唐縣屏蔽襄樊鄂西氛警稍鬆弟卽於九月中
旬返回省垣籌備餉項宸廑方切何敢安居逆情譸張又已
回竄茲定於二十六日前赴黃安必先保固境內俟餉項有著
然後遲迤而上察看賊情決策迎勦耳

復陳舫仙

九月抵至黃陂十月初至黃安兩次寄呈復函諒可先後奉達
昨接手書得悉台旆甫駐運城卽聞捻警所喜胸有成竹士習
銜枚神速之兵少許自勝多許抑且親率軍士與賊夾河並馳
先之勞之宜乎各軍用命燬賊筏而奪賊船也晉省爲完善之
區該逆垂涎已久得吾弟布置周密緊扼西防此次痛剿之餘
賊勢必蹙或自是不敢窺伺則皆此一戰之力也承詢駐紮南
陽之舉乃按前月情形逆蹤飄忽靡常朝暮不能一致鄂西前
經布置卽南陽一帶猝遇烽警亦有堵禦之師所慮東路空虛
設任賴一股驟回豫疆肆行奔突則鄂東不能不防茲兄紮住
廣水驛以便就近調度霆軍經霞帥奏請入陝卽從南陽迎剿

而前兄復檄唐時雍劉幹臣相機赴鄖以資防禦西路暫可無虞矣

復鄭譜香

我行碌碌魚雁罕通昨奉手書所示各境習教匪類煽惑人心皆由正教不昌邪教乃抵隙而入辦理此等事件當審未形之逆與已發之奸分別驅除方爲得當已發者勢非得已祇可與兵動眾一舉殲之而玉石俱焚猶抱哀矜勿喜之隱來函所指教匪係尙伏而未形者愚民本無定趨可善可惡被所惑者不過一時昧昧相率從之若遽臨之以兵彼恐無路自新反致驅入異端更益其黨羽而堅其爲亂之志也閣下綢繆未雨現旣

知各匪姓名與其住址卽密爲搜捕置之於法則餘黨見爲首者法力無靈靡不悔悟懲一儆百其勢尙可挽回較之顯然用兵紛擾村落似更易於消弭也諸望閣下燭照於先事慎重於臨事綏輯於旣事則除莠安良所保全者多矣若先疑民而臨之以兵誠中形外民亦疑上恐難善其後也故未便遽言調兵前來想必諒此隱衷耳弟現駐廣水營盤以防東路之賊回豫肆竄西路已檄唐時雍劉幹臣赴鄖防禦並有霆軍駐南陽江軍門在樊城調度目前當可無虞也

復鮑春霆

兩奉惠書並示咨稿反復細誦具見審度周詳古之名將好謀

而成不是過也捻逆深入秦中近又回竄窺鄂窺豫均未可知
據劉省三軍門來書謂張逆有圖竄荆紫之意想尊處早已得
聞至東股前在江南山東之間十一月初旬由西遂南來直逼
信陽州城弟聞信之後卽囑熊岳峰軍門率七成隊前往援應
行抵信境該逆聞有兵至乘夜突奔東赴羅山大路現在信陽
無賊已將熊軍調回並調彭杏南方伯一軍移駐應山爲合軍
勦辦之策西路一帶雄師在宛屏蔽多方來書所謂米糧充
足逆氛不足平也惟實有威望者能預決矣陝西之行業經家
兄與少泉宮保密奏稱糧草之難辦餉銀子藥之難運朝廷
必不致責望貴軍之緩行乞麾下不必系念

致劉省三

旬日以來戎行倥傯未及時致尺書貴軍自夏秋迄今防勦兼施辛勞共仰前家兄所議以貴軍及盛樹兩軍在漢黃德一帶與鄂省兩路之軍上下會勦此計本妙其咨文弟於數日前乃接到故已將子美杏南調至中路以赴東路堵禦各軍正在就道並聞盛軍已追賊豫東冀可適如前議乃逆蹤飄忽瞬息數百里有防不勝防勦不及勦之勢自闌入鄂境以後黃安麻城黃岡黃陂孝感雲夢以至德安應城晝夜狂奔疾如風雨迭經官軍扼勦而迎頭一擊旋成尾追總未能痛加懲創郭子美軍門自唐縣東來至德郡猝與賊遇大獲勝仗彭杏南方伯由孝

感西扼於雲夢乘賊少休亦獲勝仗兩仗差強人意至姜軍在麻城輿論頗沸所報兩勝恐難憑也合賊已自應城西竄蔓延天門路越千六百里我軍又俱落後每日僅追殺其尾股殿後之賊萬難撲滅全股且日內恐從棗陽出境鄂軍之可攔頭者惟棗陽劉維楨一軍襄陽唐協和一軍而襄棗地勢平衍與豫省無殊萬難遏其竄回豫境之路此弟所以憂心如焚也麾下志在殄寇疆場馳逐勞勩萬分謹將鄂中近日軍情縷述奉布以備查考弟昨晚馳至德安俟續探賊蹤擬將西上矣

致譚竹巖

日前兩肅蕪函馳報近日軍情想登籤室日口一帶勦賊情形

前函業已廩述初二日彭藩司一軍在三河口獲一勝仗斃賊千餘頃據伍提督維壽兩次馳稟知於三十日至初三日疊經繞出賊前擊賊於京山鍾祥城鄉各處時城外俱有悍賊伍軍馬隊恰到殲斃數百名賊大挫而退救出難民三千餘人現已與彭郭熊譚四軍俱在日口上下數十里之間環相圍剿日內當復有戰狀也賊如分股西竄劉鎮在棗境必可攔擊鮑軍門來咨知已奏明入鄂初六日由南陽啟行倘該逆奔竄稍遲定可夾擊殲滅矣竊謂荆襄爲全楚門戶必須有知兵道員方足以資綏靖旣當軍務緊急刻不容弛之時襄樊正是門鍵弟擬檄唐道協和署理襄陽道缺查該道本統和勝八營曾任襄陽

同知及宜昌府事於該處地望民情向來熟悉檄令署理即可
責成渠於無事之時分勇固守襄陽樊城老河口呂冠橋等處
一旦有警之日即可合軍出隊勦辦附近地面實於軍事有裨
益也查有何道元普從前官戶部時曾在都城辦理巡防著有
勞績嗣在豫省大營管理營務帶勇勦賊亦有歷年弟擬檄令
署理荆宜施道缺責成該道豫爲鎮懾宵小弭患未萌則荊州
一帶地方公事可期振作矣查鄭道崔道爲人均屬和平細心
惟嫌膽氣稍弱未能臨事弗懼不若該二道之詳知兵事弟擬
札令崔鄭兩道臘底交卸回省另候差委弟爲慎重地方軍務
起見是否有當尙未遽行給札一俟尊處賜復到日敝處卽會

列台銜分別飛遞也

復鮑春霆

日來正在懸盼連發要面請大軍一麾而東以解各軍之困頃接十一日來面知麾下又折回棗陽查擒逆大股屯聚鍾祥京山界內並未遠颺其邊馬四處游軼東至天門應城界上逆眾有十萬之多悍馬將近萬匹綿亘百數十里兇燄方張彭熊譚各軍被圍沙港一帶數日未通文報荃是以迅乞麾下早爲進剿解圍以遏兇鋒想接到前信必啟行矣並望穩結團陣處處謹防伏賊及悍馬分路包抄以操全勝蒙麾下顧念鄂省緊急荃已飛章入奏矣諸請飭部努力前驅同掃此孽其隨州茅茨

畎一路已有周張盛樹等軍進兵毋勞麾下分心兼顧祇以從鍾祥打至沙港一路目盼神速東下爲禱耳

致李少泉

十二日晚因捻逆東竄突犯應城縣界當卽草泐數行述諸左右是晚四鼓後經伍提督維壽帶領馬隊抄出賊前該逆遂却其大股仍在鍾京兩界游軼靡定先是弟函請盛軍由隨州進樹軍由應城進以扼東路後因渠二軍難以分兵是以速請其進扼京山之東南並檄姜提督玉順移紮應城方冀布置妥適是以扼住頃得信知十一日彭熊譚三軍在沙港地方鏖戰經日逆眾大敗僞德王唐日營等率眾二千人馬千餘匹力竭投

誠倉卒之間被賴汶洸覺察比狂將唐日營殺死松軍部下先
已冲出四營又有沈提督鴻賓堅字營被圍經六晝夜之久忍
饑苦守至十一日大戰解圍該營力戰與彭熊譚同時獲勝十
二日夜逆眾之逼迫安陸府城外者經劉鎮維楨一軍乘夜擊
之該逆不敢上竄大股扯向東趨星夜疾馳由應城境內經過
十五日姜軍已抵應城攔賊一擊以兵力太單未能攔頭截住
而盛樹兩軍十二日尙在安居環潭等處未能速到京南東路
則無他軍扼路十分焦灼刻下該逆大股由應城雲夢之間向
孝感大路狂奔鄂之東皖之西均無一兵百姓必受蹂躪此皆
國莖之罪也當劉省三軍門仲良廉訪在汝寧時該逆正在西

趨之際霆軍尙無來鄂之說弟未敢請其由信陽入境以爲東
路有郭子美等軍追剿必可無虞不料郭子美羅家集一挫彭
熊譚追兵之勢益孤不能攔扼東路而銘軍已抵棗陽霆軍亦
由茅茨畝而進均有鞭長莫及之勢徒喚奈何弟調度乖方思
之愧恨除現飭鄂軍彭熊譚劉姜躡蹤追剿外特此飛布台端
伏乞查照預爲料理防剿爲荷

致鮑春霆

頃間飛布一函具道東竄之賊又復折回西向今下午已過義
堂鎮必上應城鍾祥一帶荃已飭追軍緊躡其後矣該逆罪惡
貫盈此次如果西來必能猝與大軍相遇以搏象之獅用全力

搏兔其爲殲滅又何待言翹祝無似至髮捻行徑堅忍不如長毛而狡獪則過之埋伏包抄是其長技前此郭子美之敗卽係中伏之故現在我軍與戰每營必結爲團陣而行亦係學捻逆之結多陣也以憑四面抵禦每戰十營之中祇以二三營交鋒其餘七八營概係防其包抄推之三十營祇可用八九營交鋒其餘皆宜作接應以防賊馬之包抄爲妙行列必須䟽整爲出隊修隊之地賊敗之後卽欲乘勢窮返萬不可散漫隊伍必先以探馬逢村搜村逢林搜林乃可預防其伏賊如此擊之方爲萬全之策夫以麾下之身經千百餘戰凡賊中之情僞莫不洞知本無俟荃之贅述惟此捻詭詐多端近日各軍閱歷謂比髮

逆爲難剿荃與麾下十年肺腑之交誼應知無不言言無不盡聊以所聞奉達左右也

復何小宋

接奉十四日手書並吏刑部原來公函兩件領悉壹是所示部飯銀兩除奏免外俱經按年搭解並官冊一節均已詳悉當卽照來函致復部中矣前日曾將各路軍務奉聞昨日賊之邊馬尙在對河適劉幹臣一軍趕到卽同城外伍雲浦各軍追二十餘里劉幹臣晚間復襲賊館獲賊馬數十匹生擒任逆義子賊向西北遁去現揣該逆竄向非往京山天門卽往隨州隨州尤易出境弟已令彭熊二軍馳赴隨州以扼北竄之路不知趕得

到否並請銘軍劉襄辦軍及盛軍扼勦而上輔以姜劉二軍緊躡進攻勿令再向東竄昨晚樹軍在王家灣地方猛撲賊眾業已獲勝將賊馬逼退過河該軍正在奮追賊騎忽從旁出衝突樹軍致張海林軍門受傷陣亡殊堪痛惜幸淮軍相距甚近所統諸營尙有歸宿現計靈軍猶在襄棗弟飛函將賊蹤告知請其扼住西竄不知能如算否也

復沈爐青

弟安州小駐歲序俄更捻逆自襄境回竄之後仍麇聚於永澧河曰口一帶並擾及天門灰埠頭及京山城外二十里地方靈軍銘軍於初八初九兩日先後抵安陸府會商夾擊機宜日前

上路大雪雪霽必可見仗劉廉訪周軍門所部已將前赴棗陽
昨飛函請其折回防京山至宋河一路豫軍有蔣李二副將六
營紮在茅茨畈山徑鄂中彭譚熊劉各軍均緊扼阜市上下九
里崗永興鎮等處但願雨雪之後港汊漸深淮軍早日趕來各
隘口一律攔住當是聚殲之機不知天心人事兩相湊合否耳

復鮑春霆

接奉手書並抄件均已閱悉陝省猗揜交闕劉中丞請 旨飭
雄師分由潼商前進與陝軍合擊誠以麾下所統原係勦擒之
師日前捻逆西趨而台旆回駐南陽者祇因就餉就衣起見命
意所在仍是急於勦賊也今霞翁所請度 上諭無不允准而

麾下亦決意殄寇特所籌者餉項耳細讀來緘深欽蓋抱西北大局實仗聲威務望迅統全軍俟餉項一到卽日前赴上紆宵旰下拯民生在此行矣至豫鄂毘連之界該逆聞有大兵迎擊必不敢衝鋒猛拒弟處亦早檄唐時雍劉幹臣兩軍相機赴鄖以資堵禦矣

致姜清臣

初七日早間接到南汝光道蒯觀察來函知東股捻匪由西平遂平竄越汝陽正陽兩界邊馬已及信陽之龍井下午復得蒯觀察來函該逆已於昨日突犯州城軍情緊急等語此次逆蹤自山東江南界上逸出剽疾異常數日之間遽抵信境揣現在

賊之所向覘我西路兵厚定必窺伺鄂東幸雄師扼要預防足爲東路屏蔽倘賊從羅山一路進窺尊處多發偵探如可以相機進剿則迎頭剿擊如賊勢浩大兵力太單則候新軍到日會剿其挫賊之兇鋒亦是一法統祈審機度勢妥爲辦理爲荷弟一面檄調彭杏南方伯一軍由隨州東來以助雄師之威知念奉聞

致譚蘭亭

頃奉貴報知麾下於二十一日星夜拔隊具見鼓舞軍士踴躍戎行欽慰無似頃傳聞貴部已與捻逆在小河外接仗因未奉捷音不知確否日來軍信早晚不同前所咨請進援黃陂之處

原因該縣喫緊茲彭方伯已將抵陂足資堵禦而黃安拿獲奸細供稱大股在料棚頭隊到新洲有垂涎漢口之語查漢鎮爲鄂中重地目前殊無重兵誠恐該逆分股前去務請雄師無須赴陂星夜馳往瀝口游湖一帶扼住駐紮毋使該逆窺伺漢鎮卽望確探賊情改道攔截或竟駐紮漢口城外諸望隨時相機辦理神速是爲至要第該逆飄忽靡定或漢鎮萬分安堵無恙貴軍須視賊所向進而與諸軍合攻剿滅捻逆想韜略在胸權宜悉協弟相隔較遠未便遙制也弟擬今日赴孝感以便就近調度除備公牘外特此奉布並希將賊情詳細示知爲荷

致蒯士薌

日前疊承示及捻逆東竄情形實深欣感此次捻蹤流竄喘息不停前由羅山入光固時雖已延及六安度其必將窺鄂迅調彭熊兩軍馳赴東路以資合擊正在就道該逆已由白雀園入麻城縣境而姜玉順十營在彼處防守又甚不得力故賊乘我軍未到之時洊犯黃岡之新洲黃安之七里坪直至黃陂之王家河硯子岡等處時彭熊兩軍本赴黃安合剿聞賊至陂境遂趨王家河硯子岡一路二十二日正欲開仗該逆大股西遁由孝感至雲夢不分晝夜兼程狂奔頭隊已於二十三日早間抵德安府城外矣先是弟檄譚軍門五營馳蔽漢口郭軍門劉總戎兩軍由西路先後東下二十一日戌刻譚軍自小河溪拔營

行至三十里外天明開仗僅獲小勝而已郭軍於十六日自唐縣東來於二十三日可到德安現計郭軍在前彭熊兩軍緊躡其後劉軍星馳繼進以理揆之應可在德安一隅合力共擊但該逆剽疾異常自德安以上至隨棗平衍沙土無關隘無港汊又多歧路倘官軍四路緊逼恐將乘間旁逸殊難周防耳

致周海舫

頃因探報所述郭軍情形雖飛函請貴部星馳而上茲郭軍二十七日亥刻專弁來營始得追賊確信郭軍自雲夢應城直趨阜市一晝夜行二百餘里雖被賊騎兜抄子美身爲矛刺而逼賊之入水者至數千人之多已足挫兇鋒而狀士氣錫帳之落

後以間道疾趨長夫不及之故探報之訛爲失利以賊騎襲後之故現予美又已整隊於二十八日早晨向前追往矣特此報慰至前請貴部遄征之處可以從緩啟行暫爲憩息續爲合剿之謀

復彭雪琴

久不通問渴念良深日昨在安州營次接奉手書如親晤對捻逆自十月中旬由黃麻入鄂奔竄如飛弟迅調各軍星馳東下該逆已由陂孝雲應各境直逼德安府城幸我軍次第馳到歷挫兇鋒賊始遁走洊至曰口鍾祥一帶惟我軍始尙迎頭追一擊獲勝賊卽掉轉旁馳各軍雖逼賊而營出戰必勝已成尾追

之勢迎頭者祇劉鎮維楨一軍仍紮棗陽扼隘以防竄越銘軍及劉廉訪軍已近鄂邊弟請其由唐縣新野一路察看賊勢自襄棗入鄂冀可攔頭夾擊又慮該逆乘間趨隨州而出昨飛函囑盛軍卽到隨州駐紮布置大略如是惟冀天心厭亂該逆屯聚一隅待各軍四逼而來聚殲可望若仍避兵狂竄則賊眾數萬非官軍所能密圍終將抵隙而出也麾下夙操勝算尙乞有以教之

復伍雲浦

頃接手書知麾下率一枝勁旅獨禦悍賊以少勝多保全安郡城池洵屬銳勇可敬惟逆眾如蟻究不可以身輕嘗昨日一函

業已詳言並述日來軍事由駙遞安陸府不知可遞到否也所示顏副將等員殺賊陣亡實爲傷痛深堪憫惜容具奏請卹

以慰忠魂其傷亡兵勇三十餘名望一併查明示知霆軍初十由棗陽拔隊直赴安郡計程今日可到但賊之所向不定霆軍必早有確探或又折向他處迎剿亦未可知麾下軍太單來書所云與彭熊諸軍合力進剿所見甚是第此時四面皆賊選鋒營宜暫駐安陸府一帶俟霆軍遏剿而下乃可與慎嚴等合軍共剿也銘軍與劉廉訪軍亦將由棗陽探剿西路兵厚逆氛勢必東趨荃已函託盛樹二軍兼顧東路不知能與慎嚴等軍聯絡合力堵住毋任該逆竄及東路否貴軍總宜加意穩慎俟

與步隊合營時乃可相輔而行蓋自子美九營挫敗後賊燄日張我軍馬步不得不穩重以圖之耳

致李子和中丞

十二日晚間曾布一牋將捻逆東竄情形述達左右是晚四鼓後伍提督維壽率馬隊抄出賊前賊眾知我有備邊馬已掉尾折回復游軼天門應城兩界其大股賊匪仍在鍾京一帶查該逆本有十萬之眾悍馬將近萬匹綿亘至百數十里之遙兇燄實形猖獗彭熊譚三軍逼賊屯紮僅能遇賊奮擊不能深入於數萬羈羆之中恐蹈子美故轍子美養傷數日又已收集各營紮住襄河曰口矣霆軍計已抵安陸府不日即可進剿銘軍及

劉襄辦軍亦已飛函請卽由隨州繞德安由應城天門進兵宋祝三鎮軍則宜紮棗陽也盛樹兩軍已由隨州進京山現尙未抵京山也統俟各軍會合後卽可以圖痛剿惟西北二路兵力太厚東路雖亦有兵究竟地面太寬有隙可出終恐乘間鬼脫弟是以速求銘軍早到耳

致劉省三

昨晚飛布一函曾將賊情述達茲該逆已竄過義堂頭隊在楊家河遇張海柯軍截擊獲勝大股之賊聞仍向西趨各軍緊躡而前今日未有戰狀茲統計賊之所向如直西而去則霆軍尙在棗陽一帶弟昨將賊情函達想必相機回扼如該逆遇霆軍

在西又折竄京鍾之隙復趨東北則擬請盛樹兩軍仍照前策
馳赴京山之南扼住要隘如在京山天門之間徑回東南則彭
熊譚劉四軍緊逼而上而令姜軍在東路阜市一帶扼守總口
此皆預計賊蹤西竄後特擬如此辦理也如逆蹤概不出此或
圖由隨州出境則恃麾下會同仲良兄扼守北路如此則三路
有兵一面濱漢弟囑藍軍移駐沙洋並囑礮船沂漢上駛以防
偷渡似可漸逼漸緊冀成合攻之勢逆情狡黠異常朝夕百變
弟今日所料轉瞬又不符矣諸仗鴻裁幸勿拘泥弟言爲荷

復黃曉岱

摺弁回鄂接奉手書比諭箸福蕃臻潭祺懋集覽東壁西園之

勝裕經文緯武之猷猶復過示謙光優加豐譽殆將藉獎飾我者以策勵我乎讀惠書如讀名臣言行錄也舉錯之道誠吏治升降所由關寓嚴厲於慈祥要在有識者鼓舞而振興之弟何敢自信耶兩湖大水甚於往年籌巨款於穀賤之區儲以備患亦先事預防之策特軍需正繁朝夕孔亟深恐籌不及此祇益惘然李筱翁處當爲函達果能舉辦足以靖桑梓之區內顧無虞則外患或冀可禦所繫非一邦事也至於他族實偏中外不平勢且日張積重終當一返特不知需之何時待之何人能大舉而快人心耳弟前者視師襄樊回省籌餉未及旬日以捻逆回竄豫境又復出省東行歷黃陂黃安麻城一帶浮抵應山之

廣水驛暫行紮住恐山東一股回豫肆竄鄂東未敢空虛其竄入商雒一股意仍窺伺豫鄂鄂之鄖屬地本毘連商雒弟已檄唐時雍劉維楨相機赴鄖以備堵禦西路當無慮耳霆軍前已馳抵陝州緣未帶棉衣士卒多凍仆者現折回南陽就衣亦卽就餉也

復蔡硯農

接奉手書諸承詳示已悉一切年內月摺及具題之件費神之至星使由輪船沿江而下較爲穩慎捻蹤東竄仍是喘息不停經我軍抄至孝感迭次獲勝該逆又復折向西路二十一兩日在雲夢之北德安之南橫竄而西劉幹臣一軍及蔣東材六營

適至卽同伍雲浦各營追二十餘里晚間劉幹臣復襲獲賊馬數十匹生擒任逆義子賊向西北遁去現揣該逆竄向非往京山天門卽往隨州隨州尤易出境弟已令彭熊等軍由應山馳赴隨州以扼北竄之路並請銘軍劉襄辦軍及盛軍扼剿而上輔以姜劉二軍緊緊追躡勿令再向東竄若逆蹤竟趨安陸府境計霆軍尙在襄棗弟亦飛函以賊情告知請其力扼要隘倘該逆不遽遁出隨州則各軍皆及馳到可以相機痛剿也

致鮑春霆

新正初三夜接奉十二月二十七日手書知大旆尙在樊城不覺驚悵豈六七次函咨飛請移軍由棗陽進扼洋梓各書均未

達覽耶又所奉

諭旨飭令貴部在鄂先了任賴一股然後徐

圖入秦等因敝處迭經恭錄飛咨何尊處尙未接得也而刻刻以入秦爲念致忘眼前之賊此時賊已早竄過豐樂河以上劉省三軍門三十日已追至流水溝一帶計日已入棗陽矣來書似乎屯駐樊城以待賊至夫以麾下之威名統三十二營馬步隊之眾賊方且遠避之不暇焉有尋至大營附近聽剿之理麾下從前誤聽楊光杰之謠由平林店折回棗陽未免太速此次在安陸折回樊城二十七日旣聞賊到京山貴軍尙畱樊城而不拔營則又未免太遲國荃二十七夜三更專戈什哈二名送信寄與麾下不知除夕到否元旦日麾下已撥營來剿此股否

均未可知大約此股數日之內必出境赴豫矣 廷旨迭次嚴責國荃毋許驅賊出境了事而國荃全恃大軍屏蔽安陸府以西是以令各軍及早進剿不意事與願違信息遲到以致一差二誤國荃之被譴獲罪原不足惜獨念麾下以平賊爲心負海內之望此次竟與賊相左使外間議論沸騰不無稍減盛名耳國荃愚直之性又與麾下十餘年肺腑患難之交不忍以諛詞貢獻左右謹備述詳言以達愚者愛友之誠祈留意聽納並希卽日相機辦理仍遵十六日 諭旨專心先辦任賴一股幸勿拘泥前摺復請入秦致啟 朝廷之疑慮且曾中堂已奏明改派劉松山一軍入秦而留貴軍在豫鄂一帶剿辦此股正合麾

下十月內之初意也至於奏摺內及復各處信函內均不至提及貴軍周折一字請麾下放心若不將此意奉告則反係客氣相待必非麾下之所望於荃也

復譚制軍

王弁回營兩奉惠翰並承台端暨竹坡星使垂念該弁奔走之勞從優賞犒遠荷獎飾該弁益增感愧茲已照常在营當差矣初六七兩日彭杏南信來所述軍情均已先後奉聞昨杏南復有飛函並據安陸府稟確探逆蹤的已回竄安陸府一帶該逆由棗陽折回想係因霆軍在樊城未敢直上茲已飛函請霆軍遏下庶各路分駐之軍即可漸漸箍緊淮軍已直追上去宋河

一路尙慮空虛適李幼泉部郎之軍正駐信陽弟昨飛咨請其由應山而來以扼宋河未知趕得及否統容陸續布達先此奉復

致譚制軍

前三日連發數函謹將近日軍情次第詳達左右昨晚又接劉省三軍門來函備述追戰情事銘軍於二十八日因賊上竄拔隊遄追至下沙港偵得任逆率馬賊伏河邊賴逆率步賊列崗下牛李二逆佯走誘追將圖包襲銘軍先攻伏賊該逆潛遁斬擒數十人旋紮安陸府城外除夕元旦銘軍日行百里抄出棗陽之邊界適及攔頭出賊不意在山口獲一勝仗擒斬千餘該

逆晝夜狂奔又復折回東竄據避難者傳稱逆蹤已近宋河查宋河一帶弟本咨請淮軍扼剿茲淮軍既已上追宋河甚屬空虛前日咨調李幼泉軍未知趕得及否現一面函請劉仲良周海齡二軍並商之銘軍迺防宋河以遏東北一路鄂軍仍顧阜市楊家河上下相機截剿靈軍初三日由樊城撥隊東下其及接仗與否尙無確聞弟請其度勢攔擊不拘東向南向總以遏賊爲主統俟續有戰狀再行奉聞

致譚制軍

昨晚馳布一函將賊竄情形與弟擬各邊布置並追剿之兵粗述上聞未知當否昨晚張海柯軍門樹珊在德安西南之王家

灣地方親統八營銳意攻賊軍分三路海柯自搗中堅該逆業已敗奔賊馬渡河遁去海柯正在猛進忽從旁橫出賊股攔擊不及手刃數人受傷陣亡實爲可惜捻逆狡獪兇悍百倍於髮賊子美受挫於前海柯陣亡於繼二人皆戎行健將悉中賊之詭計弟已函致各軍於勇銳之中仍寓穩慎之意庶可以策萬全也查賊向西南上竄所有水師防堵襄河極關緊要乞飛飭嚴扼爲荷

致劉仲良

昨致一函想登青鑒兩日未得信息不知台旆行抵何處念甚頃知銘軍已在京山剿賊獲勝賊大股仍趨曰口逆情狡詐難

測或聞西路有靈軍逼下東路復有淮鄂諸軍避實乘虛北路正可竄出查由白口迤北仍可走京山由京山仍可竄宋河一帶該處雖係山路然究係賊之活路務祈麾下與盛軍以全副精神照顧京山竄宋河之路不特鄂民戴德卽皖西亦受無窮之賜也前路賊情軍情伏求隨時惠示數行是爲至叩

致李子和中丞

月初鄂中軍事業已迭次奉達前聞台旆出省駐紮駐節許州欽企曷已捻逆西竄襄境折回白口以後經銘軍靈軍攔逼至楊家峰一帶十五日銘軍開仗先勝後挫靈軍踵至痛擊大獲勝仗殲斃老賊以數千計救出被擄難民萬餘奪獲馬匹將近

三千步賊器械委棄殆盡該逆馬隊敗竄西上其勢趨向安陸一帶惟上路地益平曠銘軍既有小挫僅能尾追霆軍十六日已跟蹤追剿若該逆仍晝夜不息前無攔頭之兵惟唐道數營即使相機出擊亦必遮扼不住誠恐其由棗襄出境也霆軍銘軍已緊躡而上鄂軍亦分路上追李幼泉兄之軍本赴宋河弟請其由宋河梅坵取道唐縣鎮至棗陽迎擊未知趕得及否特此奉布以便盡畫籌防綢繆未雨宋祝三總戎處亦已馳函詳達矣

致龍半舟

飛啟者弟於十七日行抵黃州旋據各路稟報該逆由宿松邊

界又復折回自廣濟竄入二圻經譚劉兩軍連日獲勝十七夜彭杏南方伯擊賊於界嶺次日復擊賊於蘭溪潭坳地方殺賊無算緊迫過河忽被該逆馬隊從後路包來杏南血戰良久手刃多賊力盡捐軀各營官中陣亡者六員葆吾與焉深堪痛惜該逆現已上竄團風新洲一帶難保不乘虛由黃孝直犯雲應德安等處特此飛布務祈閣下速卽知會府縣迅將城守事宜妥爲布置並防其假冒彭軍旗幟號衣再施詭計所有畱駐德安四營曾否收近城邊務令穩紮穩守以保城外百姓切不可孟浪與之打仗致有疏虞恐誤大局也

致鮑春霆

連日疊具咨函昨又謹泐數行爲民請命盼望之切不止一日
三秋故羽書在途幾乎踵接並忘其詞之複矣春寒數日又轉
陽和貴體必漸霍然鄂民同深禱祝賊蹤現由麻城竄至紫檀
河一帶與沙口相距不過數十里蓋以鄂中各軍聲威一時難
振該逆偵得雄師尙遠故敢在此逗留雖淮軍中之勦軍已抵
麻城皖軍中之凱軍已抵羅田而該逆無甚顧忌全仗旌旆東
來鄂事乃有轉機刻下塗炭已深日盼我公救民於疾苦之中
大局幸甚百姓幸甚用再專函布陳想愛我者必能曲諒苦衷
而不厭其煩瀆也

復鮑春霆

昨前兩日連肅要函計可日內達到二十五日接二十日手書並驛遞及回差所示兩次惠函均已詳悉捻逆自前次西竄之後無日無信詳述戰狀以便勝算預籌可圖合擊乃道路阻梗驛遞遷延遲悞羽書致尊處不知底細殊覺可恨可惜雄師來鄂廷旨甚爲嘉許並責成麾下殄滅此股之後乃可一意西向云云頃接家兄函亦云留貴軍於鄂豫剿賊但令劉綬卿一軍入秦云云可見朝廷之意與家兄及少荃宮保所布置均欲麾下先行專意剿辦此股也至於賊數之多寡各省奏報不同荃前奏步賊三萬餘人馬賊七八千人極爲精悍實不容易撲滅等語此皆實話麾下現既奉旨剿辦此股則可毋容挂

念秦省惟此股馬賊極多又極兇悍與長髮行徑迥乎不同臨陣之際定要布結多陣以禦之所謂結多陣者每營站立一堆仿如營官點名親兵與五哨均會爲一處但以面向賊而已倘稍站寬鬆容易被馬賊衝爛隊伍倘隊伍一爛則敗不可救藥矣頭一二仗勝則不可追恐其誘入埋伏之內喫大虧耳此賊從不肯與官兵交戰如相逼太甚則乘間反噬惟有不露出絲毫破綻不浪與之戰戰則必勝矣刻下賊情二十三夜尙在京山界不知已上鍾祥否麾下如已至樊城應請探明賊蹤由棗陽進扼雙河洋子要隘先顧住安陸府城俟下游分兵北扼住宋河及隨州之茅茨畝東扼住皂市京山天門至明年新正上

下夾擊尙可望得手蕩平也

復巴玉農

接奉十四日惠書承示沿河防守情形及潛江境內較形喫重已承尊處撥派馬隊會合水陸各軍及該縣文武嚴加堵遏具徵籌防縝密欽佩寶深十五日霆軍之捷想尊處早已得信茲該逆由安陸府北路狂竄十七日又爲霆軍所敗逆蹤晝夜奔趨霆銘兩軍緊追而上想日來又有戰狀矣惟鄂軍本攔東路現雖星馳跟剿已成尾追前路祇唐道數營野曠路歧無隘可扼恐該逆自此兔脫耳尊處兩月來防守情形尙祈酌示

復鮑春霆

連接二十五日同發兩函欣悉貴軍追剿六晝夜勦勞倍著倚
賴孔多前將十六日大咨照錄入奏當卽錄稿咨達想已早登
青鑒矣此次捻逆由棗境竄出官軍雖未將醜類盡殲而貴軍
痛剿連番逆鋒大挫或冀其從此衰靡則剿絕亦有期也目前
淮豫諸軍均已分道入豫昨蒯士薌觀察來函知二十四日賊
已涉信陽州境揣其所向似在光羅一帶該處係賊竄故道鄂
東黃麻陂孝一帶又須設防弟已檄調西路諸軍回防鄂東分
紮黃安麻城孝感等處倘早日移駐當可扼住勿令再犯也貴
軍現在何向樊城轉運局事已迭函囑司道迅飭吳丞設立矣
知念奉聞

致李宮保

數日未曾肅函以右手筋骨奇疼不能握管而翹瞻勦望無刻
不仗指麾之力以紓郢鄂之困也賊自麻蘄竄二黃旋自陂孝
經雲應弟駐黃已越兩旬遣撤愼軍敗勇因逆蹤西竄漸涉京
山天門以趨白口必須移紮上游又以漢水淺涸偷渡堪虞軍
需甚繁餉項頻竭旋於初十日由黃州上移道經省垣小住二
三日商略籌餉之事本擬卽赴沙洋防賊渡漢頃聞襄河陡漲
六尺水勢湍急或者可保無虞茲仍將赴德安上下適中之地
再看賊情以定駐所春霆軍門復有開缺之請弟因前次片奏
之故曾具函自謝昨春翁書來云已釋然彼此同辦一事必須

毫無芥蒂方可相與有成惟來函謂積傷不能支持未知究竟如何弟頃函請其撥隊東來以期會剿窺賊所向必在白口一路則霆軍宜扼住羊梓雙河安陸府地堅守要路不必進戰專候我公所撥淮軍自東上移宋河京山扼紮鄂軍追躡而上前擬仍扼阜市九里岡永興寺要隘則可成大圍之勢俟賊疲困之日方可痛剿也幼泉令弟仲良方伯及盛軍勦軍均有書來約俟餉到軍齊卽行合隊西進想尊處早有信催其入鄂會剿矣弟右手筋痛五指拳曲不能握管心急如焚倩友另繕祈諒之我公若移駐德安隨州督師會剿則感戴救援之德實無旣極矣

復李宮保

十三日在省曾布數行想日內可達到茲接初五日惠書並示致春霆軍門信稿感佩之至所云恩怨嫌疑不必計較及再三之請有損無益等語洵是藥石之言提綱挈領倘春翁幡然頓改能體關愛之情統師東來方足以對朝廷屬望之意至弟治軍無狀正自悚惶乃來書猶謂困心橫慮動忍增益眞愛之深而望之切也現在鄂軍穩慎前進不令浪戰足慰尊念賊蹤又趨曰口但望霆軍早下扼住雙河洋梓安陸府一帶以固西路鄂軍緊紮阜市以固東路頃幼泉令弟來書商及駐紮之地弟請其與各淮軍卽紮宋河京山以固東北要路如此則三面

遮攔可以漸漸逼緊且淮軍道途辛苦亦必須紮定一處方能
休息俟兵力養銳各軍到齊尙有就地圍剿之望弟本擬卽赴
德安現在暫次漢皋再看賊情如何以定進止

致李筱帥

旬日舟車碌碌未及肅函鄂中軍事前十四日函中已述梗概
賊蹤仍滯曰口鄂軍扼阜市上下數十里各統領急欲見仗弟
函止之兇餒方張未可以獨立躁進祇囑其聯絡穩紮攔住東
路靜以待時昨幼泉令弟到德安面商進兵之策已催各淮軍
由宋埠西上將來扼紮京山宋河則東北路亦可攔住至西路
則專恃霆軍昨又飛函相促奉 旨允准十日在營調理恩至

渥矣不知春霆能自醒悟卽馳下安陸府洋梓雙河一帶否竊
計夏初河港將漲該逆如逗畱曰口一面阻漢水一面阻大洪
山三面阻官軍圍之月餘各軍滾營漸逼不與尋戰自能困之
倘天心人事兩相湊合各路同時進兵扼住要隘則此機大可
乘也弟二十日到德安與左季翁暢談兩日左軍不日卽由隨
棗西征擬畱克庵數營繼發弟右手筋痛異常不能握管苦極
寫極合併奉聞

致英西林中丞

敬密啟者前日曾將捻逆東竄情形布達左右想指揮若定早
已嚴飭邊防預爲扼隘矣昨今兩日迭據稟探所稱逆蹤自二

十八入黃安境後蔓延宋埠新洲等處其勢漸已東向則二蘄廣羅一帶難保不直竄而至該處與貴轄毘連目前無兵扼守殊屬可虞除前函奉告以便尊處飭防外弟頃又致函劉省三軍門李幼泉部郎及劉廉訪周軍門諸君迅扼蘄黃以爲皖西屏障淮軍多皖人皆應有保全梓里之意或冀早日馳下也竊念該逆旣成流寇勦辦更難賊之所趨無定卽兵之奔命益疲兇餓之衰不知何日惟有督飭將士協力同仇以冀早日殄滅查該逆兇暴過人亦是戾氣所鍾行此浩劫昔人有發流賊之塚而賊旋敗者同治元年四月弟派人掘僞聽王陳炳文三代墳墓將其骸骨另瘞他處不過月餘陳酋炳文統百萬之眾卽

大敗於上海江蘇一帶期年而滅此雖與軍務無干而逆塚理宜刨掘將其骸骨另瘞以洩其氣不特爲眾人雪憤亦除惡務本之道也茲已傳詢陸槐邦查得任化邦歐老紅之子及李慶允卽李永各逆酋里居另錄呈覽務祈台端密派能幹文員三位卽日密授機宜前往該處查確各逆三代祖塚不動聲色概行發掘亦足以消蘊孽而快人心或俟委員密爲查出密商蒙城潁城懷遠三令押令本地團紳立即掘出另瘞一間空之處旣無傷於忠厚行事之理復有裨於迅滅寇氛之機想台端必不惜此齒牙餘芬也但宜肫囑該員等必須斟酌確實查的方可動手乃不至誤損心地想委員亦必能見機行事矣是否有

當特此密商伏乞迅速施行實爲公便

復郭意誠

接奉三月十九日手函領悉一切家山回首彌切溯洄讀君書如與君晤也軍事動與心違不敢諉於劫運之未盡羣力之不合中夜拊膺祇自咎耳至於出處之間未嘗不審之於始曩者田園養病求所以答昇平者時欲假斧柯以一展之故毅然東行冀抒忱悃乃自大聲疾呼以後不敢望有所爲爲之亦輒拂乎初志軍事其一端也夫旣不能有爲則一日之貪戀皆一心之內疚故前函所言有接興追感往來之意所遇使之然豈所見忽有異哉然無論昨歲之欲行而行與今歲之欲止而不得

止較之林宗高蹈一神仙一塵溷矣十畝桑柘萬軸牙籤童冠
追隨春風滿座卽未厯乎絢爛者亦羨此平淡之福况世味久
嘗能毋翹企鄂疆之蹂躪於賊自冬徂春烽煙未熄月前竄曰
口復思合圍以困之自杏南旣挫鄂軍之力不復可以再分乃
命諸將屯阜市合力以當東路促淮軍扼宋河當東北一路俟
霆軍移至洋梓則大圍之事可諧顧春霆抱病方深未能督戰
迫飭所部東下而賊已自洋梓逸出避兵肆竄將由隨州境內
迤達應山官軍又因之僕僕矣鄂省練置淮勇俟篠帥蒞江城
當可面聆方略弟初移黃州一月現在仍駐德安羽檄如馳迄
無暇晷右手筋絡發痛竟致不能握管寫甚

復江良臣

接展初二日手書知因沙洋弛警曾江兩部暫駐宜城並以唐白河一帶水淺多灘會商唐時雍觀察派營扼堵具徵籌防周密欽佩奚如霆軍馳紮八條岡弟飛函亟請移扼洋梓竟已不及賊卽從洋梓迤北而東往復邊關又趨陂孝刻已過木蘭山下竄姜劉兩軍緊躡而前弟並飭譚熊伍三軍星馳踵發淮軍周海船所部曾於台子畝譚家河一帶截擊獲勝斬獲頗多目前劉省三軍門劉仲良方伯李幼泉部郎楊少銘軍門各淮軍均已北出河口南出木蘭山分道東趨又可與鄂軍聯絡會剿惟東路野曠路歧港汊乾涸兵力雖已不薄仍復不能周攔霆

軍遠隔千程鞭長莫及不知此股捻逆作何了期也至陝境張
逆一股昨李少帥亦有書來恐其有由渭華入豫之勢現適左
季帥整旅西征當可攔頭遏擊矣

致李幼泉

自貴軍追剿北行後遙望征塵翹首致慕前日泐數行計達左
右麾下不分星夜策馬前驅固已不遺餘力乃該逆狡黠狂竄
如飛不數日間已過信陽正陽復由羅山竄鄂自二十八日趨
黃安之黃陂站後蔓延新洲宋埠等處其勢既向東趨則二蘄
羅廣在在喫緊該處毘連皖境弟已飛飭鄂中各軍星馳東下
雖皆次第趕到然欲兜抄賊前攔住入皖之路萬來不及且鄂

軍東向愈速更有直逼逆蹤急趨下游之勢用特飛函奉布諸望飭探前路相機扼住蘄黃一帶則皖疆完善之地尤可及早保全想麾下英謀偉略必能速商淮軍以全力從蘄黃一帶擊上杏南率鄂軍從黃孝夾擊而下則鄂之二蘄黃梅廣濟與皖之宿大皆可望救全也

復潘伊卿

接展三月十三日惠書鄂中軍事弟實謀之不臧日深怨艾乃荷多方慰藉言之不足又長言之關愛之忱淪沁肺腑然弟亦知憂之無益而負擔未弛誰執其咎滿目瘡痍欲勿憂得乎南雲芳圃兩君弟早經函致而遲遲尙未見覆當再促之亦須力

裕餉源方敢議添軍之舉季泉弟所論甚是弟亦云然去冬今春弟卽令各部合軍方與圖戰郭之敗彭之亡皆未合軍以致撓挫其戰非出弟意也何子文軍門尙未來營渠固知兵弟亦素知其人其如籌餉之甚難何捻蹤始滯曰口正擬三面合圍鄂軍已到阜市九里岡攔其東路淮軍次第西上紮住宋河京山攔其東北一路專候霆軍自樊城馳下紮住洋梓則該逆南濱漢水北阻洪山無路可趨必致坐困乃春霆軍門一病頗殆不能督軍往返函商直至二十四日始派宋長慶等統全隊下而賊二十五已由洋梓等處取路迤竄二十六日在隨州之茅茨畈余家集等處矣現祇得令各軍緊追不能痛剿知關遠

念用特布聞

復何小宋

昨接十三日手書領悉一切展緩京餉之摺已由制府附片出
奏慰甚天久不雨弟亦步禱數日昨雖得驟雨片晌而止今日
祈禱如舊但願連得大雨庶幾畎澮港汙俱可滿盈農事兵事
兩得濟矣賊勢西竄已詳前日公函茲該逆仍趨曰口各軍絡
繹馳往昨劉省三軍門自京山來函計里分營熟籌攔扼之策
甚爲周密惟諸軍尙未到齊但望賊蹤仍滯曰口則淮軍在京
山宋河鄂軍在阜市九里岡一帶霆軍十七日自隨州拔往迤
趨洋梓數日亦可趕到各軍到後互相約會再得雨多港滿大

是圍剿之機事之成否在天特不能不儘力做去耳霆軍宋長慶每遇移軍必有信來商酌弟亦直言勉之似尙相愜幼泉部即解回之一萬兩現由釐局撥解慰甚餉事支絀焦慮實深弟前者函致各觀察處耕娛兄已有回信未知吾兄與玉芷兩兄已熟商及之否李筱翁十八日啟行月底可以履任矣弟右手奇疼不能繕字苦不可言

復劉綬卿

接展正月二十三日自富平所發惠書欣悉一切麾下於蹋平後河賊巢之後旋由醴泉進兵厯興平涇陽臨涇渡等處會同諸軍儘力剿洗連獲大勝洵足摧兇鋒而狀軍勢快慰之至猗

捻經此挫折此後勦辦更當得手矣鄂中軍事迄無了期計正
月底至今賊蹤出入三次鄂軍自彭方伯挫衄之後力更單薄
雖疊次尋戰僅能各獲小勝月前賊在白口幾乎可以合圍乃
以春霆軍門抱病增劇霆軍不能東移致留洋梓一路被賊逸
出現在流竄鄂東往來於陂孝等邑路歧野曠攔扼無由淮軍
悉在鄂中而自海舫一勝之後馳驟數百里未得見仗賊之避
兵肆竄剽悍異常洵可惱憾惟各飭所部相機截勦而已

復李筱帥

昨正馳布一函藉達鄂中軍事頃接惠翰領悉種種幼泉令弟
昨日函來尙駐花園地方現已約會各淮軍由河口鎮木蘭山

兩路躡往鄂軍姜劉兩部已緊向前追譚熊伍三部接踵而進各軍俱是東向則淮鄂異路同趨處處可以呼應今日探并回營據稱賊分兩股一向仙花店北去一向宋埠東去果爾則是出豫之勢非窺皖之勢也其自賊中逃出之勇卻云逆館中紛紛俱說要到陽邏則又似留戀鄂中之勢鄂東地曠路歧港汊乾涸頭頭是道斷無合圍之望祇能儘向前追可以兜剿則兜剿而已若竟因窮追出境則目前且固吾圉誠如尊函所云整守各隘不必出境一以休兵力一以嚴邊防然後勤修堡寨以爲後圖季叟西征克庵亦已偕往霆軍速來與否尙未可知如賊竄出則亦無須移此大軍矣韞齋先生初四日開船連日南

風不知能早到岳州否霞筠二公脩然塵外此境良不易得妬
甚羨甚承念鄙恙仍未稍愈窘甚

復蔡硯農

曩在德安營次接奉惠書後知台旆卽由輪舶東旋故未肅覆
光陰一瞬已過天中常英翁在署襄理井井有條握晤之餘殊
深契洽捻逆於四月二十三四日陸續出境始猶逼近鄂邊防
其由老河口偷渡漢水又經布置旬日該逆偵知有備遂爾遠
颺想都中接閱豫省之報早已確知竄向矣鄂軍奔命久疲勢
亦單弱不能遽令出境跟追現飭分赴邊隘各派專守之路卽
以訓練爲養息或可冀成勁旅也至境內堅壁清野事宜業經

次第舉辦茲復迅催各屬當可卽早蕝事弟四月二十八日回省後諸務紛集日與筱泉制府潛心商榷粗有頭緒惟天氣久旱民不能耕土坼秧枯益復惴惴右腕作痛兩月不愈窘甚

復左宮保

接奉二十五夜惠書並克帥原函宋稟批稿均已詳悉貴部二十一日移營夜間復進逼孟家集張家集等處該逆逃威駭竄又復進追獲勝賊蹤遂從唐白河西去此番襄棗一帶蹂躪不久皆由帥纛駐扼及克帥時雍各軍絡繹相望該逆不敢停留遽出新鄧感幸何如雖初意原在圍剿而攔扼不住則且驅之疾走亦足以疲賊而息兵耳宋長慶等軍弟前日接奉手諭後

卽函請其確探賊蹤馳赴老河口扼紮茲麾下擬囑該軍紮南岸伺賊半渡擊之尤爲勝算想渠必遵示而行也唐時雍先率兩營前去更屬妥慎克帥原函及宋稟批示誠如來書所云恐此後湘淮之隙日深矣弟昨知其事而不遽函告省三者慮伊等益復執拘則更固結而難解也頃已將此事告之筱帥謂將致書少翁及省三當可於忠告之中寄排解之道此固麾下與弟之所深望者車馱購雇旣難則帥節與克翁分道而前自較便捷弟手疼如常不能繕寫心急如焚

致譚竹巖制軍

兩日所布軍情各函想可次第登覽頃李部郎自花園來書云

捻逆初七日悉由小河司東竄已抵河口鎮地方查姜軍在楊店居河口之南劉軍在界河又居楊店之南南有軍則賊竄其北此該逆之故智特未知此次賊東竄時繞近楊店否俟姜軍有稟報來始知其有戰狀否也譚熊伍三軍自白沙鋪發來探報與幼泉同銘軍已到花園將與幼泉共酌進兵仲勳兩軍前日駐鄧店現亦馳向東矣弟昨飛商春霆及宋長慶諸位擬請霆軍東移未知能早來否但張總愚一股又恐有由渭華出豫之勢事在未定令人右絀左支好在左帥正由樊城西征必可當張逆窺豫一股也

致劉省三

午間奉布數行並抄寄幼泉兄來函想明日可達尊覽今日兩接宋長慶軍門書知由紅茅畝陳家店吳家店而往核計路程今日當至吳家店該處在洋梓之北靈軍自係南下之勢頃據京山縣及敝處探報據云賊竄郢東驛有趨安陸洋梓之說不知確否郢東在洋梓東南如果靈軍南向賊蹤北向恰好迎頭尋戰第恐一出洋梓歧路更多長圍之謀不復能遂惟望麾下就近確探如賊未出洋梓則宜合圍如賊已出洋梓則祇有神速追剿與靈軍夾擊而已諸仗相機辦理必臻穩捷倘與靈軍相近尙望指示約會爲荷弟已函囑宋長慶就近與麾下商榷也

復黃南坡

月前曾布數行計登青鑒天中節近長晝如年筱帥於四月二十六日已履督任適弟自德安回省鄂中諸務商推有資現在蒞事之初尙無舉動三四日來僅議及大略而已捻逆二十三日自棗境竄向新鄧據二十四日劉省三軍門來書云賊竄唐縣大股逕向北走同日江軍門及襄陽恩守來書則云河口喫緊竄向不甚符合或賊股不聚一途各述其所探耳弟相距已遠未便遙遙調度祇有函請霆軍由八條岡地方勤發偵探迅往堵剿一面飭唐時雍分撥數營進紮老河口並飭水師泝漢而上至鄂軍勢單力疲業已調赴各邊擇隘固守藉資訓養勢

不能再令西趨自憊其眾且看此數日間賊有準向便可斟酌
定計手痛如舊心急如舊必須賊蹤去遠方可安心畫策熟籌
制賊之方耳天氣亢旱地坼秧枯若再旬日不雨深恐加之以
師旅因之以饑饉其患有不可知者想老兄必有以教我也

復宋長慶

昨接大咨知唐元圃軍門團山之捷穩猛兼施欽慰之至卽當
據咨入 告頃接二十二日惠書更詳壹是貴軍餉項自當遵
爲函催以濟營用此番麾下與各軍門統師西上不著聲威無
異春霆爵帥在營調度想春翁聞之必更欣慰可以安心調理
以期早愈也據尊函所示該逆似向新鄧出境旣係歧路孔多

不能攔扼祇得緊追驅出鄂境麾下先派馬隊前驅繼以步隊甚合機宜佩甚至於權統大軍春翁相倚既久弟更敬服有年尙祈與諸軍門共集大勳遙體春翁屬望之意是所企盼賊如出境後貴軍暫候餉項一面咨商李宮保倘賊去漸遠少帥自當咨請移師耳弟稍駐數日擬卽回省一行籌畫餉糈布置防守

復劉韞齋中丞

接讀十五日手諭敬悉壹是席廉訪赴黔典兵而北方伯飭回本任不知席廉訪果允出山否子美英氣勃發固是將才此後重出統師但望其稍加審慎不類暴虎馮河者之所爲則桑榆

之功於斯人正有厚望想李筱帥昆季必有以善用之笏山議
論透闕利害炯然惟治法旣詳而治人難得非有才德兼備之
吏未足勝斯任也鄂中捻股經淮鄂霆軍次第剿捷該逆不敢
停留旋於四月二十三日由棗境竄出新鄧聞已迤趨南陽未
得確信天氣枯旱港汊盡乾鄂中不能攔賊則不如尋戰取勝
驅之使遠再爲堅壁清野設兵防隘之計所慮民困於黠寇又
困於天時則亦徒喚奈何耳兄於二十八日回省適筱帥新履
督任深資商榷

致劉霞仙中丞

日前以戈匪之事頗系遠懷嗣知一鼓殲除深仗謀維之力桑

梓之地同慶安熙遙體盡懷實深感慰此事發之於驟雖難預防而紳團及早埽除較之潰裂而謀之者所保全爲尤大也日前旣已平靖韞齋先生復令各屬整飭團防換戶保結則此後奉行弗怠或可毋煽惑之患矣捻逆自出鄂境後始猶逼近襄屬恐其復侵老河口爲偷涉漢水之計旋經迅撥數軍馳往扼剿該逆知已有備遂卽迤東遠颺自南陽折赴舞陽後卽趨許州中牟洧川等處於五月初八日入山東境天氣旱乾運河枯涸恐竄入曹濟以後不特東省有警卽豐沛一隅亦將有風鶴之傳也鼎軍已由豫東折回不知能擇隘扼住否鄂軍餉乏力疲無能爲役現飭分守各隘日前俱已到防趁此氛警稍鬆可

以乘暇訓練惟天氣旱甚不能插秧雖步禱多時亦獲時雨而
霖霖之澤不能潤圻裂之田尙不卽沛甘霖農事何堪設想湘
中多雨天時不均未免日深悚惕耳

復李宮保

六月朔日兩接二十四日惠書領悉一切賊已竄過運河東省
又費周章悶甚帥肅冒雨啟行已於二十二日抵朱郡並擬前
駐濟甯以便居中調度天方炎暑櫛沐孔勞曷勝繫念前次尊
函囑弟撥軍出境早與筱帥商酌擬候大咨到後卽遣譚仁芳
劉維楨統帶萬二千人馳往助守茲賊蹤剽疾已由泰安而東
琴軒方伯省三軍門力持倒守運西之議弟與筱帥商定自當

仍遵前諭派譚劉兩軍各帶行糧馳赴歸德聽候調遣也西路
軍事壽卿屢獲勝仗賊數尙有三萬人現季帥由潼關進克庵
由荆紫進而囑高果臣由鄖陽進秦中兵力漸可稍厚矣春霆
未能卽愈接統洵難其人尊處請家兄定議會檄唐提督分統
一軍東向而令宋長慶等靜駐樊城聽候會商辦理想善處之
方指日可有定奪也弟日前臥病旬日現雖稍愈仍是疲憊不
堪日前已請假一月冀可靜養久旱之後幸沛甘霖農事尙不
致大礙

復陳舫仙

接展五月三十日手書領悉一切台旆趁防務稍鬆之會擬旋

省垣一行因左帥有約自宜暫爲留候庶面酌機宜便可周密
萊仙令弟在湘募勇尙未過鄂承示晉防情形良慰遠系河水
旣漲氛警漸遙礮船次第竣工邊圉可以自固陝事以壽卿一
軍最爲得力左部分道西向該逆覓路四竄未知能兜攔得住
就地殲此一股否秦之南山正接鄂之鄖屬倘該逆挺而走險
難保不窺伺鄂疆業飭鄖陽楊鎮襄陽唐道就近會商密探撥
防矣渡運之賊仍滯登萊李少帥從省三琴軒之議扼守運西
鄂軍亦已分撥譚仁芳劉維楨二十餘營觸暑長征馳往協守
兄臥病旬日近雖略瘥而日對藥爐肢體殊覺疲憊月前請假
一月未知靜養一番能漸復元否芳圃南雲俱尙在湘餉項支

紉萬分急切不能添募四月底家鄉戈老會滋事幸經蘊齋先生飭團撲滅並舉辦保甲團練之事可以防患未然南中諸君子意在嚴拿重懲昨得家兄寄來告示曉諭愚民俾各予以自新僅誅其實有悖亂之迹者庶在會之人不致激而生變保全當不少也

復彭雪琴

接展初十日手書領悉一切蒙以鄙事爲念深荷關垂弟治軍半年未能將此大股就地殄滅負罪滋甚乃朝廷寬大僅予薄懲感激無地惟冀運防有成殲此醜孽庶稍釋宵旰之憂天下幸甚鄂皖幸甚連接李少帥暨豫中來信知已進扼膠防該

逆馬步撲攻經淮軍東軍擊退目前鄂軍到齊分布替防少帥
卽已前抵膠萊調度諸部倘膠防可恃則運防亦移而就膠又
可騰出一二軍前往進剿少帥布置如是當可乘水漲之時一
舉殄之也貴體筋骨漸瘥六月二十九日又吐血半鉢聞信之
餘心膽爲之一戰怙念之至是否因亢旱積熱觸動而發日來
秋氣漸涼肺金司令當已霍然矣弟所患未能稍痊依然守方
服藥而已

復劉綬卿

接展七夕所發惠書領悉一切麾下自初一日由高閣轉戰而
前連日獲捷將該逆自蒲城東北驅至蒲城之西及富平之大

王村昌甯村等處無攻不克威望益彰惟賊屢敗善逃當此河水盛漲肆竄於蒲富高渭等境意在平坦無阻可以逞其竄越誠如來書所云官軍非四面圍剿難遽成功也竊念一軍獨立縱橫往來非有麾下之善馭將士善測賊情豈遂所向無前動多斬馘茲已將十萬之賊剿剩一二萬櫛沐辛勞天下共見所苦者各軍士誼篤同袍不辭况瘁今年旱潦不均夏秋閒又行時疫致令積勞既久抱病中途遙想之餘同深憫惻指日秋高氣爽左帥各路大兵俱可到齊則沴氣既消兵力亦厚四面圍剿之舉可冀有成此股逆賊必始終就殄於名上將之手也東股捻逆仍是沿海肆竄李少帥派兵扼住膠防賊雖窺撲一次

官軍穩固未動現計各省協防之軍均已到濟本係扼守運河
然如膠河可扼則限賊之地更爲逼仄各軍移運就膠尤覺緊
湊耳弟抱恙未痊秋暑方蒸益形疲憊

致李宮保

旬日未奉手教未知帥纛前赴沂兗駐紮何處念念前據探報
言賊分三股嗣後淮安濟甯沂兗等處俱無續報不知有無戰
事賊情如何直省梟匪聚黨益眾闖入東境近日能大挫其鋒
否均系遠懷西股張逆竄踞漢中南山一帶倘再向東南便是
鄂之鄖境左季帥進逼華州劉高兩軍分道進剿吉林馬隊亦
已抵關張逆必有回竄之志姜玉順軍前赴荆紫不知十一營

之力能扼住此路否耳昨據蒯士薌傳聞東境之賊由曹州竄
近歸德想必不確若果爾則一經回豫鄂邊便須設防現在霆
字所畱之十四營統將未定宋長慶決志不接統已赴金陵稟
商矣婁峻三新營甫立方始訓練均未敢遽令長驅此外並無
一軍特此函懇尊處倘賊蹤回竄豫疆迅求飭令譚劉二軍兼
程回顧以慎鄂防是爲至禱弟所患未痊續假一月已發摺矣
致郭中丞

旬日未通音問想見攬勝湖山娛情翰墨爲頌爲慰昨閱邸抄
知兩淮一席業已擺脫從此堂開綠野圃種黃花鑒秋水以洗
塵撻歸雲而作伴優游之樂欽羨者何止第一人耶東捻經銘

軍獲勝追壓至贛榆沔陽一帶旋撲鄒城復經皖軍擊退逆蹤
欲窺清江又爲洪澤湖所阻現竄宿遷之李家莊李少帥進駐
台莊各軍嚴扼運岸鄂中譚劉兩部仍在濟甯之靳口開河西
圩地方毘連防禦不知運防綿亘果能處處嚴密否耳鄂中秋
旱以來已成歉歲忽於八月下旬漢中水發直灌下游二千餘
里襄河陡漲水三四丈沿江郡邑水沒雉牆小民何辜遭此浩
劫冬春困於寇夏秋困於旱茲又洪水爲災殊堪憫痛

復凌問樵

昨誦惠書知前函已達青盼猥以履任焚防遠承藻飾惟誦迴
環徒滋感慙僕久處田閒謬司河務拜 命後遵卽就道前月

二十二行抵汴垣次日受事明知汲深綆短不無兢惕之私而艱鉅旣膺敢不勉力馳驅以圖補救特恐積習太深挽回不易耳承示茶事章程立法甚善足見任事者規畫周詳有治人兼有治法不患不日有起色也

復譚文帥

前奉藻詞優飾愧無以當甫遞報章續奉十二日手書敬悉勳祉並隆慰如所祝承示塞外情形誠爲今日棘手之事是非應變靖亂之才濟之以深謀遠略實未足以當此重寄爵相威望旣隆權衡在握朝廷任之以專責成西事其有多乎閣下於輕車熟地幕府宏開吏治民生講求有素早已與國家休戚

相關今幸蒼生有福得我公臨乎其上提其綱而振挈之咸熙
之績復見於西土矣夙仰公之爲政不圖赫赫之名自有蒸蒸
日上之勢翹盼新猷誠爲三秦額手稱慶無已也弟未讀河渠
焉知治水仰邀 高厚殊不敢以疾病爲辭權輿履任譬之手
理散絲一無端緒部署少定伏汎將臨亟須周履全河用意體
察庶其中之曲折雖不能了然於胸或不至茫然無措所慮河
流變幻月異日新而度支之支絀積習之相沿驟難挽回用是
兢兢時虞覆餗夙仰澄清偉抱而又近接鄰疆敢祈箴規時逮
則所惠爲不淺矣

致文質甫

日前曾布寸函諒登鐵閣弟初預導河之役恐貽測海之譏現當漲軟三篙正在籌防九曲部署稍定卽當出省閱工馳驅僕僕不敢告勞所慮責重材輕未易挽回補救殊惴惴耳劉侍御陳請規復運道一疏自是當今要務有旨會商自應體察情形妥籌具復竊思運道之廢已非一日連年試辦雖亦無誤浮送而節節阻梗煞費經營所以不能復舊者則以工鉅費繁斷非徒手所能集事弟備員河上濫厠分司固不敢以度支之缺苟且偷安亦何敢逞一己之私妄議規復事關數省應如何統籌全局而後可有益倉儲仰慰宵旰除函商同列諸位大君子外尙乞宏謀碩畫有以見示無不遵行弟履任未久百無知

識黃運情形尤所未諧近於東豫兩省中熟悉邇日實在者細爲諮訪確鑿謹述其大要另紙呈覽伏望尊裁示覆曷勝企禱之至

復劉峴莊制軍

奉到前月二十六日賜函敬悉一是承示河事切中肯綮讀之欽佩前此會議之旨本指運道而言治黃之說不過據所聞之難推言今日治之之不易需款累千百萬豈今日所能兼及耶尊示治黃暫勿更張運河亟須修復誠明論也轄疆各工旣經執事規畫自可無虞淺阻其在東境者地段較長游塞亦甚補救之方稚穉中丞自有勝算益無須鄙人在遠之遙度也已

函請稚翁定一成說挈銜覆奏與合肥爵相大咨之意相同至於添設廳汎部臣欲何員履勘然後定奪究之亦非稚翁折衷辦理不可弟馳驅兩岸昨旋省垣現交大汎駐工督防大致尙屬救平足紓盡念

復陳小浦

昨誦手覆恍若面談惟屬望之至殷覺譽詞之過當動以古人相勸恐貽當世之羞循省之餘益滋愧矣鹺務一端利源最廣而時世之苦買亦最甚在昔創議新章不知幾費籌度事至今日成效可觀而局外覬覦輒思變計自非當軸者胸有成竹鮮不爲眾論所搖峴帥事事循舊其卓識正不可及海防變幻百

出臺事甫就滇疆又小有口角彼泉制軍早已卸篆大約新秋
可以成行比來梅雨之甚聞之到處皆同若不及此暢晴深以
農功爲慮弟視事兼旬得家信知四月杪有斷絃之憾然不敢
以私廢公現於入伏後循例駐守工防積雨旣久深恐來源過
旺不能不先事綢繆所幸大致救平足以布慰遠注

復李子和

前修蕪覆計達籤曹昨得正杪惠函辱承記注殷勤而所以獎
勵之者有加無已迴環三復能勿感慚雨生中丞旣拜新除剋
期東渡荒榛甫闢籌策倍難任其事者必有久大之規以貽無
窮之利度支缺乏實爲近今第一難事卽如鄙人疏陳各節部

中亦明知事非得已終不敢輕於一議現以籌款一端詢及三省有無成說尙不可知豫中一切平安惟冬雪無多春膏未渥望澤綦殷微恙亦以天時亢燥驟難平復然較前時已大輕減矣注念及之感尤無既

復葉蘭臺

奉二月望前賜覆誦悉一切今春北數省無不缺雨而近畿一帶盼雨尤甚此閒日前得雨二三寸四野均霑不特春耕無礙而時疫亦一掃而淨都門祈禱疊申想至誠所感亦必早沛甘霖西陲貔虎雲集不患兵力不厚而患餉糈不充商借洋款原非至計而舍此另圖不識左相又作何生法耳滇南使者必

俟觀審之酋到滇乃可結案弟目疾較去冬漸輕然尙未能脫然春工緊要不獲宴然一室也山舟先生像尙未覓到胡文忠像已託鄂中友人代捐當不至久稽時日冰如方伯計早到京汴中情形當一一得之晤談矣

致朱宇田

弟河岸馳驅忽忽已周歲紀轉瞬大汎當以全神注之勞瘁所不敢辭惟期浪靜波平庶幾上慰宵旰下奠居民幸比歲以來公事尙不費手足以藏拙耳昨接津門友人來書論及謀國之計自強必先致富而其道莫要於操利權以塞漏卮卽如今日洋布實百貨中一大宗也每歲計之所費不下數千百萬而

利之所歸不在華而在洋今日收回利權擬在內地設局紡織行之有效可收無窮之利上其議於合肥爵相意在集資舉辦然非有成本二三十萬不能創此局面原議以萬兩爲一股按數起息官爲經理入股者坐享其成不問其事尊意如以爲可行能否廣爲招徠約計能湊若干尙祈斟酌情形先行示復如有定議再將詳細章程隨後寄閱

復魏溫雲

得月初來書織布一節爵相意在必行而幼帥則以費重利輕不欲特開生面兩者各有所見身處局外未敢妄置可否總之吾輩任事必須略有把握而後可受之不疑閣下任採訪之勞

復陳利弊之所在見可而進知難而退此中絕無成見應爲當軸所共諒書詞亦婉曲周至耐人深思開採煤鐵就中土之利源謀生財之至計事理較順資本亦輕小試其端未嘗不可布置一切可能漸次就緒否鄙况碌碌粗平足以布慰

復譚文帥

塵俗紛如久疏箋候正深馳仰快展惠函聞關隴雨暘時若可占大稔地方尅敝民力拮据非此不足以蘇其困塞外軍事但知前隊已過古城毅齋以全力注之不患烏城之不克而患白逆之遠颺兼之萬里轉糧無一兵一騎之衛是亦不可不慮盡籌所及聞者悚服滇案未了威酋以所求不遂負氣而行要挾

多端詭計迭出卽使轉圜有術而此後交涉勢必更形棘手筠
叟京居鬱鬱勢類觸藩一時泛泛悠悠未必遂能見諒江閩兩
省水厄爲數十年來所未見吾湘雖未如是之甚然受傷亦復
不輕近畿連得透雨人心稍安而各路饑民雜以狡黠之徒聚
眾劫奪所在多有幸無大股兵力足以了之河事極平靜斯真
如天之福弟以初伏出駐工次昨甫回省炎天馳逐不知所苦
差足報慰雨蒼壯志未消然非假以尺寸亦無所施其技不知
近來得有所事否

復陳雋丞

昨得還章比來飢口嗷嗷而頑悍之徒乘機生事鄰近各省所

在多有幸而雨澤已透人心大定防兵得力勦撫兼施斷不至
釀成巨股西路未聞戰事而前驅已過古城兵權不一轉餉不
易雨蒼所慮不可謂非識時之論然有左相爲長城又得克帥
以副之深謀碩畫當不至有他慮也中外交涉更形棘手彼族
以所求未贖故作大言然舉世洞燭其奸而不能不爲之備波
瀾迭出可爲浩歎弟駐工匝月竊喜浪靜波平晏然無事茲於
二十四日回城清釐積件昕宵攘攘諸託粗平屬書之件容俟
有便卽當檢寄

復丁雨生

昨得閏夏旣望手書藉諗台候尙未充復而政繁寄重偏未能

稍節勤勞秋高氣爽遙想動定多綏尤望隨時珍重爲禱閩中
水患數十年僅見之事斷非一手一足所能挽回天寶爲之於
人何尤而盡運所籌無微不至乃斯民不幸之大幸賑貸非空
拳所能集事公款如此之絀需用如此之殷懸釜待炊急切作
何生法念念近畿以春夏久旱亦復飢口嗷嗷到處騷然不靖
幸有小暑後疊次透雨得以補種秋糧人心少爲安定而河務
則以工料錢糧爲最要各州縣之征解不旺司款卽難以應期
而修防喫緊之時遂不免種種掣肘惟祝水勢安流不生奇險
斯乃如天之福耳鄙人目疾迄未痊可二三知好每以靜養相
規而冒暑馳驅正與相背所喜精力耐勞此外尙無所苦西人

要求無狀 朝廷百計懷柔難滿所欲近聞爵相有烟臺之行
轉圜之計當在此時筠老進退維谷而泛泛悠悠之口又無以
諒之勢類觸藩良可慨也

復葉蘭臺

奉月之初三日賜書今年小暑節前迤北一帶幾有赤地千里
光景雖議撫議賑疊沛 綸言總覺地廣人多難於博濟幸而
半月之內迭被滂沱不僅歲有轉機凡在萑苻亦不敢藉端滋
蔓前此山東境內及豫皖接壤之區已覺騷然不靖自此可相
安無事矣海氛偏迫難以理諭而情曉果其同類相殘實屬快
心之事然不可不預爲之備誠如卓見所及西路以左相爲長

城以克庵籌後路而出關諸將又皆各擅智勇奮袂爭先節節進規不難得手弟自入伏移駐工防兼旬以來河水消長無定隨機保護幸託平安用堪告慰

復魏溫雲

昨得月初惠復試辦煤鐵著有效驗亦足以開闢利源較之織布究有把握事在創始立法貴周董司宜慎自非從者回湘料理不足以昭慎重往返約計三月回揚當在黃花時節中外事件日益棘手窺其意不過肆其饕餮之性此外別無陰謀然卽此取求無厭應之者已覺力不能支爵相鼓輪烟臺當可收束前文化爲無事然東行已閱兼旬所議如何尙無所聞極爲馳

念北路以久旱之後疊沛甘霖雖不能轉歉爲豐大致已可無
虞誠爲萬幸前託代辦各件雖所費無多斷不能置之不問先
請墊付隨後奉歸費神感甚毅吉觀察尙未西上致書業已轉
交